

Djåbe pa djåbe.

Conte dès cîs du Rivadje.

Gaston Lucy- Presse-Annonces- 7 août 1970.

Cand on va pa l'route du Vresse à Orcimont, passé la goufe à deus Ewes, dins la côte à gâtche, à pô près à mitan-côte, on wèt ène caverne.

Lès vîs d'jint ku, là d'dins, i gn'a d'mèrot des Nutons pou des cîs k'i gn'è, des Pépés pou les zôtes. Alèz sawè kwè, là, vous !

Il érint sèrviâbes, mès rancuneus , si on les mankot! Pèrson.ne n'avot jamwès sù à coubin k'il' astint, mwintes d'après la rumeûr.

Si on l' z' î pwârtot des solés à rassav'ter, lu landmwin à matin, ils astint r'fwêts et bin grêssîs. Pou les z'ustî.yes en fiêr, c'ére parèy.

Coume pay'mint, in l' z'î d'not kate galètes et in pot d'lassê.

Lu çî ki n' pa.yot nin rutrouvot tout s'bazar supî.yî l'djou d' après.

I gn' avot des vantards ki djint awè vû leu fwådje à bwès. Mês, alèz les crwâre, là, vous !

I n'fât nin sondjî ku les nabots, c'est des sâvadjes, don; cès Pépés-là, ç'ére des nains, des nabots, kwè !

C'ére pu k'râre d'à vèyyink tins du djoû, malgré k'i s'ambuskint co bin dins les virées pou wêti lès djon.nes coumères du Vresse ki wârdint leu tropê.

In còp, yène du zèles vinot tous les djous wârdier ses trwâs - kate gades après la Goufe. In Pèpé, ki l'avot r'markée, s'è catchi des djous dèrant drî ène grosse pîre, pou sawè la ravizer à pléjî. Ç a s'comprend, don ! ène djon.nète du 16-17 ans, et l'êr avike, an plus !

Tous les djon.nes oumes du Vresse courint après, malgré k'ile n'ére nin ritche, mès ile plêjot. C'èst bin pou ça ku l'Pèpé a f'jot ostant et k'in bê djou, i s'è hazardé à lî côzer. Il anviot les oumes et il astot djalou. I s'è min.me mètu in djou à vnu à l'mâjon.

Ç'astot in fin cwab'jî. Il avot rassav'té toute la famyîe pou rin. Il avot min.me fwêtu pou la coumère des solés si bêts et si fins ku toutes les donzèles des alantous la djalouzint cand ile dansot avu cès solés-là.

Tout l'monde è don sté à courant du Pèpé, et à l'mâjon, ni les parints, ni la coumère nu vèyint ça d'in bê ouy. Lîe avot peu pou s'n'âme, s'ile continwot à courtizer. Les parints avint peu d' manker l' Pèpé et d'à pa.yî les consèkances. Il falot don wêti du s'mète kite du Pèpé, sins trop brusker, peu des swites.

On z'è bin sté trouvé l'Curé, pou prinde consèy. Tout c'k'il è sù fwêre, c'èst stouner la gamine, pou la fwêre kranki.yî. Du rèsse, i n'è nin volu s'à n' occuper.

I n'dumèrot pus, pou les parints, k' d'aler à Suni, dlé l'vî bèrdjî. Lès bèrdjîs sont toudis dins lès virées et dins les bwès. I counichat les bièsses, les plantes, et in tas d'trucs et du r'médes pou toutes les maladîes et pou tous les cas.

Lu vî bèrdjî è tuzé in bon moumint dins lou-min.me, pîs il è dit às parints:

- Vlâ lu r'méde ! Il èst put'ète in pô ètranje, mès il est bon ! Du mwins, si vous n'ôz nin peu des swites.

- Choutèz- là, bèrdjî, ç' ki compte, c' est du n'n'esse kite avu lou !

- C'èst bin dècidé, insi ?

- Ahy, ahy, alèz-î.

- En ç'cas là, vous frîz insi ! vous mètrez in rond d'bréjes bin roudjes t'âtoû du feu à l'tère, et par-ci, par-là, dins les bréjes, vous mètréz des scrâignes d'ûs avu dl' amwindjî du toutes les sôrtès, du pwin à lassê, des cartouches à l'grêsse, û à rousse, du tchou et du lârd, anfin, vous wêrez bin. Fujèz pou in mî !

Cand l'galant è arivé l'djûdi (lès Pépés courtizat toudis l'djûdi), i s'avot mètu su s' 31; il vlot d'mander la coumére.

Mès, à pon.ne intré, la drole du bat'rie d'cwizine l'è intrigué. C'ére èn' afront k'on lî fjot. La colère lî è monté èt il z'î è dit :

- Dju comprinds, dju sus d'trop, vous n'vlèz nin m'vèy. Vous n'mu wêrez pus. Tout v'z'è toudis bin toûrné, jusk'asteure. Eh bin ! c'esr fini ! Nu rouvièz jamwès m' bonswâr. Vous z'ôs ramassé yâk pâme pa pâme. A pârtu d'anute, vous z' alèz tou r'piède, èt ça n's'rè nin pâme pa pâme, mès djâbe pa djâbe.

Et il è rèchu fin mwê.

La mère et la bwêchèle ont volu couru après, mès l'père les z'è apêchî.

Et c'èst d'adon ku t't'a fwêt è dustoûrné à leu mājôn. C'èst nin rin d'awè à fwêre às Pépés !

Gaston Lucy